



# ILIDŽA

**INFORMATIVNI BILTEN OPĆINE ILIDŽA**  
**Ilidža • April 2016 • Broj 148**





## REDOVNA SJEDNICA OPĆINSKOG VIJEĆA



## Usvojen Izvještaj o izvršenju Budžeta za prva tri mjeseca

Općinsko vijeće Ilidža na 38. redovnoj sjednici održanoj 28. aprila 2016. godine u Multifunkcionalnoj sali usvojilo je Izvještaj o izvršenju Budžeta Općine Ilidža za period 01.01.-31.03.2016. godine. U prva tri mjeseca ukupno ostvareni prihodi i primici iznose 6.006.846,57 KM, a ostvareni rashodi i izdaci 4.287.995,98 KM. Razlika između ostvarenih prihoda i primitaka i rashoda i izdataka 1.718.850,59 KM prenosi se u budžet za naredni period. U prva tri mjeseca izmirene su sve obaveze koje se tiču redovnog rada organa uprave, a nastavljeni su kapitalni projekti, između ostalog, izgradnja sportske dvorane-atomskog skloništa u Sokolović-Koloniji, nastavak saobraćajnice Ilidža-Hrasnica, izgradnja vodovodne mreže Rakovica, regulacija vodotoka, nastavak rekonstrukcije Sedme osnovne škole, čišćenje javnih površina.

## Usvojen Izvještaj o radu i finansijskom poslovanju boračkih udruženja

Vijeće je usvojilo Izvještaj o radu i materijalno-finansijskom poslovanju boračkih udruženja Općine Ilidža za 2015. godinu finansiranih iz budžeta za redovnu djelatnost i projektne aktivnosti uz zaključak da udruženja koja nisu dostavila izvještaje i čiji izvještaji nisu potpuni iste dostave najkasnije u roku od 30 dana Službi za boračka pitanja Općine Ilidža. Ukoliko se ne budu pridržavali odredbe ove odluke, neće imati pravo učešća za dodjelu sredstava za narednu budžetsku godinu i morat će izvršiti povrat neopravdano utrošenih dodijeljenih sredstava.

## Zabranjene kladionice u centru Ilidže

Općinsko vijeće Ilidža na 38. redovnoj sjednici utvrdilo je Prijedlog odluke o izmjeni i dopuni Odluke o obavljanju poslovnih djelatnosti na području općine Ilidža. Izmjenjen je dosadašnji član 5. Odluke o obavljanju poslovnih djelatnosti prema kojoj se u ulicama Rustempašina, Ustanička, Mala aleja, Harisa Merzića, autobuski i tramvajski terminal, dr. Mustafe Pintola, Butmirska cesta, desna strana od kružnog toka do broja 18, Željeznička i Emira Bogunića Čarlija, neće moći obavljati igre na sreću. Izmjenama, mijenja se i dosadašnji član 8, koji će ubuduće glasiti da u poslovnim prostorijama koji se nalaze na udaljenosti manjoj od 50 metara od dvorišta vjerskih objekata te osnovnih i srednjih škola zabranjeno je točenje alkohola i upotreba uređaja za reprodukciju muzike izvan tih prostorija. Također, u poslovnim prostorijama koji se nalaze na udaljenosti manjoj od 100 metara ne može se obavljati djelatnost igara na sreću. Obzirom, da Odobrenja za priređivanje igara na sreću donosi Federalno ministarstvo finansija, donošenjem ove Odluke općinski organ neće moći provesti, u smislu da zabrani rad kladionicama i priređivačima drugih igara na sreću u ulicama u kojima nije dozvoljeno obavljanje te djelatnosti prema Odluci. Nadzor nad sprovođenjem Zakona o igrama na sreću vrši Federalno ministarstvo finansija sa Poreznom upravom. Porezna uprava vrši i poslove inspekcijskog nadzora. Općinsko vijeće na prijedlog Općinskog načelnika, donijelo je zaključak, kojim zahtjeva da Federalno ministarstvo finansija i Porezna uprava, nakon stupanja na snagu Odluke o izmjenama i dopuni Odluke o obavljanju poslovnih djelatnosti na području općine Ilidža, izvrše inspekcijски pregled prostora u kojima se obavlja djelatnost igara na sreću i utvrde ko posluje u ulicama u kojima ova djelatnost nije dopuštena prema navedenoj odluci, te poduzmu sve zakonom propisane mjere. Vijeće je zatražilo da se od Ministarstva prilikom produženja odobrenja za priređivanje igara na sreću ne produžava ukoliko se prostori u kojima se priređuju igre na sreću nalaze u ulicama u kojima se ta djelatnost ne može obavljati prema ovoj Odluci.


**REDOVNA SJEDNICA OPĆINSKOG VIJEĆA**

## Odluka o organizaciji mjesnih zajednica

**N**a osnovu Zakona o principima lokalne samouprave u Federaciji Bosne i Hercegovine i Statuta Općine Ilidža Vijeće je donijelo Odluku o organizaciji mjesnih zajednica na području općine Ilidža. Ovom odlukom uređuje se organizacija, službeni naziv i sjedište, područje koje obuhvata sa granicama i druga pitanja od značaja za organizaciju i djelovanje mjesnih zajednica. Dosadašnja Odluka o osnivanju mjesnih zajednica koja je donesena 1998. godine kojom su područja mjesnih zajednica određene i utvrđene ulicama iz tog perioda. Od 1998. godine do danas izgrađen je veliki broj stambenih i poslovnih objekata u svih 16 mjesnih zajednica što je stvorilo potrebu za utvrđivanjem i davanjem novih naziva novonastalim ulicama, te je važeća odluka po ulicama postala neprimjenljiva i stvarala probleme i nejasnoće kojoj mjesnoj zajednici pripadaju novoizgrađeni objekti, a i radi ravnomjerne zastupljenosti prilikom predlaganja kandidata za članove savjeta mjesnih zajednica. Da bi se prevazišle nastale nejasnoće novom odlukom granice mjesnih zajednica se utvrđuju opisno vodeći računa o stvarnom stanju na terenu.

## Donesena odluka o izmjenama i dopunama Statuta

**O**pćinsko vijeće Ilidža donijelo je Odluku o izmjenama i dopunama Statuta Općine. Vijeće Ilidža umjesto dosadašnjih 27 vijećnika, imat će 31 vijećnika, čiji će se izbor vršiti na način i po postupku utvrđenim Izbornim zakonom BiH i ovaj broj mandata će se početi primjenjivati od lokalnih izbora koji će se održati u oktobru 2016. godine. To je svojim glasom potvrdilo 19 vijećnika, a četiri su bila suzdržana.

## Informacija o zimskom održavanju cesta

**N**a sjednici Vijeća bila je i Informacija o zimskom održavanju cesta na području općine Ilidža za 2015-2016. godinu koju je vijeće primilo k znanju. Informacija je bazirana kroz tretman uklanjanja snijega sa kolovoza sa pratećim aktivnostima neophodnim za odvijanje bezbjednog pješačkog i motornog saobraćaja, te održavanju saobraćajne signalizacije. Zimsko održavanje saobraćajnica provodeno je u periodu od 15. novembra 2015. do 15. marta 2016. godine po utvrđenim prioritetima sa određenim i osposobljenim bazama i mehanizacijom opremljenom za izvođenje radova. Nadzor nad poslovima zimskog održavanja lokalnih cesta provodjen je putem Službe za razvoj, komunalne poslove i puteve uz pomoć sekretara mjesnih zajednica.



## Program zaštite i spašavanja ljudi i materijalnih dobara od prirodnih i drugih nesreća

**N**a osnovu Zakona o zaštiti spašavanju i Statuta Općine Ilidža Općinsko vijeće donijelo je Odluku o usvajanju Programa razvoja zaštite i spašavanja ljudi i materijalnih dobara od prirodnih i drugih nesreća Općine Ilidža za period 2016-2020. godina. Programiranjem i planiranjem stvaraju se uslovi da se zaštita i spašavanje ljudi i materijalnih dobara od djelovanja prirodnih i drugih nesreća provodi organizovano i planski kroz provođenje mjera i aktivnosti na sprečavanju nastanka nesreća, na spašavanju, otklanjanju nastalih posljedica i organizovanju civilne zaštite za provođenje planiranih mjera. Program razvoja i zaštite donosi se za period od pet godina i sadrži procjene ugroženosti, stanje organizovanosti CZ, preventivne mjere, smjernice za organizovanost snaga zaštite i spašavanja, program obučavanja i osposobljavanja, smjernice za istraživačku i razvojnu djelatnost od značaja za zaštitu i spašavanje i pregled očekivanih troškova sa izvorom finansiranja.



## Delegacija Kantona Sarajevo posjetila Općinu Ilidža

Načelnik Općine Ilidža prof. dr. Senaid Memić i njegovi prvi saradnici, pomoćnici, bili su 11. aprila 2016. godine domaćini delegaciji Kantona Sarajevo, predvođeni predsjedavajućom Skupštine Anom Babić. Predsjedavajuća Babić zajedno s ministrima nastavlja susrete s općinskim administracijama u Kantonu Sarajevo, a sve s ciljem boljeg upoznavanja, razmjene informacija i dogovora oko buduće saradnje. Načelnik Memić je upoznao goste sa radom općine, njenim karakteristikama, historijatom, potencijalima i istakao najznačajnije projekte koji se rade. Vodosnabdjevanje Rakovice, izgradnja saobraćajnice Ilidža-Hrasnica, regulacija korita, izgradnja kanalizacije u Hrasnici, Butmiru, Stupu, stvaranju uvjeta za zdravstveni turizam (otvaranje novih klinika), a jedan od najznačajnijih projekata je projekat Nova Ilidža. Osnovni problemi su imovinsko-pravna pitanja u dijelu prostornog planiranja, komunalnih poslova. Problem, prema načelnikovim riječima je i nedovoljno uključivanje nadležnih u rješavanje pitanja vodozaštitne zone.

“U narednih deset godina Općina Ilidža bi trebala biti dobar pokretač razvoja privrede i ekonomije u Kantonu Sarajevo. Investitori ovdje su “na čekanju” zbog sporosti administracije koju ograničavaju loši zakonski propisi. Ima stvari koje mi hrabro preuzimamo na svoja leđa i ne želimo da napredujemo ni na čiji račun. Želimo vlastitim snagama, vlastitim investicijama, vlastitim planovima da bolju budućnost što prije dovedemo do našeg stanovništva. Najbitnije je uraditi vodovod u Rakovici,



saobraćajnice, skinuti embarga na zaštićene zone i zapošljavanje” izjavio je načelnik Memić.

“Ovakve susrete želimo iskoristiti za međusobnu bolju saradnju da nas upoznate s vašim problemima, a i interesima, da se informišemo o vašim aktuelnim pitanjima za koje smo mi nadležni da ih pokušamo urediti. I Skupština i Vlada je vrlo jedinstvena i želimo da i općine budu dio zajedničkih dobrih rezultata”, rekla je predsjedavajuća Skupštine Kantona Sarajevo Ana Babić. Rečeno je između ostalog i da će Ministarstvo komunalne privrede ove godine za pitanje rješavanja vodozaštitne zone izdvojiti 500.000 KM.

Delegaciju KS, pored predsjedavajuće činio je Mario Nenadić, ministar pravde i uprave, Mujo Fišo, ministar saobraćaja, Zilha Ademaj, ministrica zdravstva, Senad Hasanspahić, ministar komunalne privrede i infrastrukture, Amela Dautbegović, ministrica za rad, socijalnu politiku, raseljena lica i izbjeglice, Čedomir Lukić, ministar prostornog uređenja i zaštite okoliša, te Muharem Fišo, ministar za boračka pitanja.

## Delegacija Privredne komore Bafre iz Turske posjetila Općinu Ilidža

Delegacija Privredne komore grada Bafre iz Turske, 8. aprila 2016. godine posjetila je Općinu Ilidža. Goste iz Turske primio je načelnik Općine Ilidža prof. dr. Senaid Memić sa saradnicima, a sastanku su prisustvovali i predstavnici Foruma privrednika Općine Ilidža. Na sastanku su razmijenjena mišljenja i razmotreni mogući oblici saradnje privrednika Ilidže i Bafre. Načelnik Memić je tursku delegaciju upoznao sa ekonomskim, privrednim i turističkim potencijalima i razvojnim projektima općine, te mogućim oblicima saradnje od turizma do poljoprivrede. „Ilidža je jedna od najrazvijenih općina u BiH. Prva je po broju turističkih noćenja. Ilidža je i obrazovni-univerzitetski centar, a u planu je razvoj zdravstvenog turizma, te insistiram isključivo na privrednoj saradnji. Moje je da otvorim vrata, da povežem privrednike BiH i Turske. Osjećajte se kao da ste kod svoje kuće. Bosna je sigurna i lijepa zemlja“, poručio je načelnik Memić.

Gosti iz Turske su prilikom posjete domaćinima predstavili grad iz kojeg dolaze, predstavili svoj dosadašnji



rad i postignute rezultate. „Grad Bafra se nalazi na obali Crnog mora i poljoprivreda i turizma su najznačajnije privredne grane. Turska je u zadnje vrijeme napravila značajan iskorak u razvoju i izlazak na tržište Evrope nam je izuzetno interesantan i bitan, a to možemo najlakše postići u saradnji sa privrednicima iz BiH. Interes nam je da namjere pretvorimo u stvarnost i da iz ove posjete izvučemo maksimum saradnje“, kazao je Yavuz Selim Muratoglu predsjednik Privredne komore Bafre.



## Festival Ilidža 2016. trajat će pet dana

Općini Ilidža 26. aprila 2016. godine održan je sastanak Organizacionog odbora "Festival Ilidža 2016". Tradicionalni festival narodne muzike „Ilidža 2016.“ ove godine održat će se od 3. do 7. augusta na Ilidži na Ljetnoj pozornici. Ove godine ljubitelji istinske narodne muzike moći će uživati pet dana u raznolikom programu, posebno koncipiranom i oslonjenom na izvornu narodnu pjesmu. Pjesme koje su obilježile Ilidžanski festival nisu podlijegale trendovima, bile su zasnovane na jasnoj melodijskoj liniji i aranžmanima koji su oslonjeni na izvornu bh. muziku pa tako će biti i ove godine, zaključeno je na sastanku.

Festival će biti otvoren izložbom posvećenoj tradiciji i ljudima koji su dali značaj ilidžanskom festivalu, a za te potrebe koristit će se historijski podaci koje posjeduje Kuća sevdaha. Druge noći predviđeno je za takmičenje harmonikaša afirmisanih i neafirmisanih muzičara, a treće noći bit će takmičarska, vokalna noć odnosno autorska noć. Očekuje se predstavljanje 15 izvođača koji će izvesti isključivo narodne pjesme bez turbo-folk segemenata. Četvrta noć je revijalna gdje bi posjetioci uživali u pjesmama Duška Kuliša, Miroslava Ilića, Ljubice Berak, Adnana Jakupovića, Bebe Selimović, Semira Cerića Koketa, Tereze Kesovije. Pete večeri bit će održane karaoke - show isključivo narodne muzike.

Na ilidžanskim festivalima su nastali najveći hitovi kao što su Jablani se povijaju, Ilidžanko, ti Bosanko, Ja te pjesmom zovem... i mnogi drugi, a svoju blistavu karijeru su započeli najveći interpretatori sevdalinki kao što su Safet Isović, Nedeljko Bilkić, Nedžad Salković, Beba Selimović i mnogi drugi.

## U toku regulacije Dobrinje i Zujevine

Na području općine Ilidže u toku su radovi regulacije korita vodotoka Zujevine i Dobrinje.

Na lokaciji MZ Blažuj, kod Bosanke firma "Mevludin Comerc" d.o.o izvodi radove u dužini od 130 metara, a regulaciju korita vodotoka Dobrinja na lokaciji MZ Stup II – kod INTEREX-a izvodi firma ORMAN u dužini od 50 metara. Radove finansira općina Ilidža i Ministarstvo privrede Kantona Sarajevo, a nadzor na izvođenju radova vrši Zavod za izgradnju Kantona Sarajevo.

U toku godine je planirano da se izvrši regulacija korita vodotoka Zujevine u MZ Osijek u dužini od 100 metara kao i čišćenje vodotoka na području općine Ilidža.

## Uručeni ugovori za dodjelu 65 plastenika

Općina Ilidža kontinuirano podržava razvoj primarne poljoprivredne proizvodnje. Na osnovu Pravilnika o utvrđivanju uslova, kriterija i postupaka za ostvarivanje prava na dodjelu, a u okviru realizacije projekta „Dodjela plastenika na općini Ilidža“ i ove godine je organizovana dodjela plastenika. Na prijedlog komisije, općinski načelnik je donio odluku o dodjeli plastenika za 65 osoba, površine 100 kvadratnih metara sa kompletnom opremom čija pojedinačna vrijednost iznosi oko 3000 KM. Za realizaciju ovog projekta Općina Ilidža je iz budžeta izdvojila 182.000 KM. U sali Općine Ilidža 25. aprila 2016. godine, korisnicima su uručeni ugovori o dodjeli i isporuci plastenika.

„Općina je od 2010. godine do sada podijelila ukupno 442 plastenika čija ukupna vrijednost iznosi oko 1,3 miliona KM. Ovo je najbolji način pomoći građanima, da im omogućimo da sami svojim radom proizvedu hranu za svoje potrebe i na taj način ostvare dodatni prihod, što je korisnije nego drugi vid pomoći. Ovo je naša pomoć i obaveza prema ljudima koji su u stanju socijalne potrebe i neka vam je sa srećom“, kazao je načelnik Općine Ilidža prof. dr. Senaid Memić u svom obraćanju dobitnicima plastenika.

## Akcija čišćenja Mjesne zajednice Sokolović- Kolonija

Povodom 22. aprila Dana mjesne zajednice Sokolović- Kolonija i Dana planete Zemlje 17. aprila 2016 organizovana je ekološka akcija čišćenja ove mjesne zajednice. Čistila se lijeva obala Željeznice od mosta Alije Izetbegovića prema Ratnom mostu, te dijelovi ulica Ahmeta Ljubunčića, Trga 22. aprila, Ibrahima-hafiza Riđanovića, Huseina Đoze.

Pozivu za učešće u ovoj akciji se odazvalo oko 50 građana.

Ovo je već treća akcija ove vrste koju organizira Savjet mjesne zajednice.

Građani MZ Sokolović- Kolonije, kao i svih mjesnih zajednica, trebali bi sa Općinom Ilidža nastaviti sa ovakvim aktivnostima kako bi se unaprijedila ekološka svijest svijeta nas.





## Godišnjica oslobođenja Sarajeva

Prije 71 godinu, 6. aprila oslobođeno je od fašista Sarajevo u Drugom svjetskom ratu. Tim povodom zajednička delegacija Općine Ilidža i Udruženja antifašista i boraca narodnooslobodilačkog rata Ilidža, te delegacije boračkih udruženja odbrambeno-oslobodilačkog rata 92-95. i političkih partija položili su cvijeće na spomen-kosturnicu u Velikom parku na Ilidži i odali počast svim poginulim u Drugom svjetskom ratu i proteklom odbrambeno-oslobodilačkom ratu u Bosni i Hercegovini. Svečanosti su pored članova Udruženja antifašista i boraca narodnooslobodilačkog rata Ilidža prisustvovali i predstavnici boračkih udruženja općine Ilidža, političkih partija, izviđača, učenika i brojni građani. Prisutnima se obratio Stevo Kuljanin jedan od učesnika NOR-a koji je evocirao uspomene na te dane.

## Dani otpora i herojstva Košćan 92-95

U organizaciji Udruženja boraca "Veterani rata 1992-1995 Rakovica 23. aprila i Općine Ilidža obilježena je 23. godišnjica Bitke za Košćan. U sklopu programa obilježavanja godišnjice na spomen obilježju u Rakovici položeno je cvijeće i proučena Fatiha šehidima i umrlim borcima Rakovice, Armije RBiH i MUP-a RBiH. Održan je i tradicionalni marš "Stazama rakovičkih boraca" od Rakovice do Košćana, u kojem su učestvovali borci, planinari P. D. "Rakovica 2009", planinari "Fasto" Sarajevo, izviđači odreda izviđača "Rakovica 9", jahači škole jahanja "Planinski konj" Rakovica, predstavnici Općine Ilidža, veliki broj građana i gostiju. Na platou sela Košćan održana je centralna manifestacija obilježavanja 23. godišnjice Bitke za Košćan kojem je prisustvovao veliki broj građana, predstavnika boračkih udruženja općina Ilidža, Hadžići, Kiseljaka, planinarskih i izviđačkih društava, predstavnika vlasti Kantona Sarajevo, općina Ilidža i Hadžići, kao i predstavnici vojne misije Republike Turske u BiH.



## Dostojanstveno obilježena godišnjica smrti Amera Cenanovića

Prije pet godine, prvog aprila 2011. godine prestalo je da kuca srce velikog čovjeka, našeg komšije, prijatelja, našeg načelnika Općine Ilidža Amera Cenanovića. Tim povodom delegacija Općine Ilidža, učenici i nastavnici Osme osnovne škole „Amer Cenanović“, te članovi Gorske službe spašavanja i Streljačkog kluba Ilidža učenjem dove, Fatihe i polaganjem cvijeća obilježili su godišnjicu od Amerove smrti i još jednom se podsjetili na njegov plemeniti lik i njegov nemjerljiv doprinos u razvoju općine Ilidža, tužni što ga više nema, a ponosni i zahvalni što smo ga poznavali i imali.



## Obilježena godišnjica formiranja Diverzantsko-izviđačkog odreda „Fikro“

Polaganjem cvijeća na spomen stećak ispred Doma kulture u Hrasnici i učenjem Fatihe, 9. aprila 2016. godine u prisustvu porodica šehida i poginulih boraca, kantonalnih i općinskih zvaničnika, ratnih komandanata, boraca, učenika i brojnih građana obilježena je godišnjica formiranja Diverzantsko-izviđačkog odreda „Fikro“ 4. viteške motorizovane brigade Armije RBiH. Proučena je Fatiha i na mezarima Emira Bogunića Čarlija i Ejuba Sarajkića Eke i ispred spomen obilježja šehidima u Hrasnici. Zatim je upriličen obilazak šehidskog mezarja Kovači-Hrasnica gdje je proučen Jasin i dove šehidima i umrlim pripadnicima diverzantskog odreda. Svečana akademija u znak sjećanja na slavne dane odreda održana je u prepunoj sali Multimedijalnog centra na Ilidži gdje su evocirane uspomene na herojske podvige pripadnika DIO „Fikro“ koji je bio jedna od najelitnijih jedinica 4. viteške motorizovane brigade, koji se borio na svim ratištima širom Bosne i Hercegovine i koji je bio primjer multietičnosti i ponos stanovnika slobodnih ilidžanskih prostora. Da je tako svjedoči i 70 poginulih šehida ovog odreda koji je zvanično formiran 9. aprila 1992. godine od dobrovoljaca, najhrabrijih sinova i kćeri ilidžanskih prostora okupljeni u specijalnu jedinicu MUP-a BiH na čelu sa komandantom Fikretom Prevljakom. Najistaknutijim pojedincima dodijeljene su zahvalnice, a učenici Druge i Pete osnovne škole izveli su prigodne recitale. Godišnjica obilježavanja je nastavljena prigodnim druženjem u restoranu „RVI-Ilidža“.



## Dan odbrane Ilidže 22. aprila - Da se ne zaboravi

U organizaciji udruženja Patriotska liga Ilidža, Četvrte viteške motorizovane brigade i Općine Ilidža, 22. aprila održana je manifestacija Dani odbrane Ilidže, u okviru koje se obilježio i Dan Mjesne zajednice Sokolović-Kolonija, te godišnjica Odreda 22. april – 3 motorizovane brigade, Četvrte viteške motorizovane brigade i formiranja Ratne bolnice “Čamil Marić“ Hrasnica. Polaganjem cvijeća na centralno spomen-obilježje ispred zgrade Općine, šetnjom od Instituta do Pete osnovne škole, započela je manifestacija “22 april Dani odbrane Ilidže- Da se ne zaboravi” ključnog datuma u odbrani za sve Ilidžance.

“Na današnji dan vođena je jedna od najznačajnijih bitki za odbranu Ilidže. Slabo naoružani branioци uspjela su odbraniti prostor od Ljetne pozornice i nanijeti neprijatelju ogromne gubitke, ali je u toj akciji ranjeno 10 vojnika. Svojom spretnošću i srcima ovom akcijom borci Četvrte viteške motorizovane brigade uspjeli su spasiti Sokolović- Koloniju, Hrasnicu i Butmir u naredne ratne četiri godine. Emocije su mi pomiješane i nakon toliko godina kao da je bilo jučer. Generacijama moramo prenositi pričom i slikama, ko ih ima, da se ne zaboravi i ne ponovi nikad” rekao nam je Mirsad Mirojević, ratni komandant Odreda 22. april.

Ispred Pete osnovne škole na spomen –obilježje brojne delegacije su položile cvijeće i odale počast svih šehidima i poginulim borcima.

Husein Mahmutović, tadašnji načelnik Općine Ilidža istakao je da je 22. april datum kada je bila prva borbena akcija i da svi trebaju biti ponosni na ove očeve, rođake, prijatelje, te nastaviti njihovim putem.

Obratio se i ratni komandant Četvrte viteške brigade, general Fikret Prevljak koji je evocirao uspomene na 22. april 1992.

“Sjećajući se 22. aprila 1992. godine mogu reći da je na taj dan spašena slobodna teritorija Ilidže od budućih deštava. Borci koji su taj dan krenuli iz pravca Kovača, Stojčevca, Butmira i Sokolović-Kolonije prema Ilidži su organizovano krenuli i osujetili ono što je bilo spremljeno za ova naselja. A bio je pripremljen genocid. Od tada smo imali respekt neprijatelja prema nama. Htjeli su da Sokolović-Kolonija nestane, Butmir pogotovo, a Hrasnica da bude poslastica i vjerujete danas niko ovdje ne bi bio. Ne može nas niko otjerati s naših ognjišta, a mladima poručujem da istraju u obrazovanju i da zajedno izgradimo Bosnu kakvu bi svi željeli. Borci samo traže da se poštuju, cijene i da se ne zaborave nikad njihove zasluge” rekao je general Prevljak.

“Odgovaj određuje ponašanje. Ovo je čas odgoja. Vi mladi ste naša budućnost. Naši neprijatelji 1992. nisu dozvolili da prođe ni hrana ni struja ni lijekovi, ubijali su ranjenike, krali djecu. Danas, od nas ne očekujete da mi budemo ljudi koji ćemo uraditi sve. Vi ste djeco odgovorni, imate obavezu da izrastete u prave ljude, da ne kažete uradit će nam za državu načelnik, general, privrednici. Učite, znanjem se borite da budete privrednici, ekonomisti, intelektualci. Živite istoriju. Budite dobri da vam ljudi zavide na znanju, da vas moraju poštovati i oni koji su vam neprijatelji” naglasio je načelnik Općine Ilidža prof. dr. Senaid Memić, dodajući da bi bili priznati moraju se izboriti da budu duplo bolji od svih. Učenici Pete osnovne škole izveli su prigodan program.



## Obilježeno 24. godine od pogibije Hajrudina Klepe

U organizaciji Udruženja organizatora otpora veterana rata, dobrovoljaca, prvoboraca i branioца “Zelene beretke” i Općine Ilidža 5. aprila 2016. obilježeno je 24 godina od pogibije Hajrudina Klepe.

Ovaj datum se obilježava ujedno kao i početak prvog organiziranog pružanja oružanog otpora agresiji na BiH.

Porodica Hajrudina Klepe, delegacije Općine, Zelenih beretki, SUBNOAR-a, Gorske službe spašavanja, položili su cvijeće na mjestu pogibije Hajrudina Klepe, proučili Fatihu i odali počast ovom šehidu.

Prisutnima se obratio načelnik Općine Ilidža prof. dr. Senaid Memić i poslanik u Skupštini Kantona Sarajevo general Fikret Prevljak koji su podcrtali važnost jedinstva a ujedno i da Hajrudin Klepo neće nikad biti zaboravljen.

“ Među prvima se priključio organizaciji Zelenih beretki koje je na ovom prostoru organizovao Husein Hasibović. Aktivno se uključio u akciju izuzimanja oružja MTS-a iz baze, koju su na poziv SDS-a napustili pripadnici koji nisu osjećali BiH kao svoju domovinu. U naselju su napravljene punktovi i prihvatna mjesta za prikupljanje izuzetog oružja i MTS-a. Moj rahmetli Hajrudin se vraćao više puta. Nažalost Hajrudin se jednom nije vratio. Ovaj datum je za mene najteži u životu” kazao nam je Meho Klepo, otac Hajrudina Klepe.

Učenici Treće osnovne škole i Udruženje “Bašlija” izveli su prigodan program.

## Podijeljeni paketi za socijalno najugroženije članove

Udruženje logoraša općine Ilidža, 29. aprila 2016. godine u prostorijama udruženja organizovalo je akciju pomoći svojim članovima. Ovom prilikom podijeljeno je 30 paketa sa prehrambenim artiklima za socijalno najugroženije članove udruženja. Pakete vrijednosti oko 50 KM koje je obezbjedilo Ministarstvo za rad, socijalnu politiku, raseljena lica i izbjeglice Kantona Sarajevo korisnicima uručila je Slavica Gorančić sekretar ministarstva. Ovo je još jedna od uspješnih akcija ovog udruženja.



## Školski bazar u Drugoj osnovnoj školi

Već treću godinu zaredom Druga osnovna škola organizuje Školski bazar koji je ove godine održan 8. aprila 2016 godine u prostorijama i dvorištu škole, a u čijoj realizaciji su učestvovali učenici, roditelji, privrednici, Vijeće roditelja, uposlenici i menadžment škole. Učenici su zajedno sa nastavnicima izložili svoje kreacije koje su radili na sekcijama tokom godine, a roditelji svoje prehrambene proizvode. Bazar je bio prodajnog karaktera. Jedan dio ostvarenog prihoda od prodaje izloženih artikla ići će u humanitarne svrhe, a jedan za potrebe učenika i škole.

Cilj projekta je da se učenici, nastavnici, roditelji i stanovnici naselja kroz kreativan i human rad druže i zabave što najbolje govori slogan ovogodišnjeg Bazara „Školski bazar nas veseli, neka kupi ko šta želi“.

## Svjetski dan zdravlja obilježen

Svjetski dan zdravlja obilježen je 07. aprila, a u organizaciji Crvenog križa realizovane su aktivnosti na promociji zdravlja i zdravog načina života. Ove godine se provodi akcija „Pobjedimo dijabetes“, u okviru koje su građani Ilidže imali priliku besplatno izmjeriti šećer. Mjerenje šećera u krvi je vršila dip. med. teh. Mediha Zulić, koja je uz to savjetovala građane po završetku mjerenja. Nivo šećera u krvi je izmjerilo više od pedeset građana. Volonteri su vršili podjelu edukativnog materijala prolaznicima. Akcija je realizovana uz podršku dnevnih novina Faktor i JU Apoteke Sarajevo, a odvijala se na više lokacija u FBiH.

U Četvrtoj gimnaziji Ilidža je za učenike drugog razreda održano predavanje na temu dijabetesa, simptoma, prevencije, liječenja, te životu sa dijabetesom. Predavanje je održala dr. Amina Ibrahimović Mahmutović, uz mlade volontere.



## Podjelom knjiga školama i bibliotekama obilježen Međunarodni dan dječije knjige

Međunarodni dan dječije knjige proslavlja se svake godine 2. aprila na dan rođenja Hansa Kristijana Andersena, autora mnogih bajki i pjesama koje su obilježile djetinjstvo miliona djece širom svijeta. Ovaj dan obilježava se s ciljem da se promoviše dječija književnost i čitanje, kao i važnost dječije knjige, te potakne i razvija ljubav prema čitanju. Tim povodom u Drugoj osnovnoj školi u prisustvu učenika i nastavnika osnovnih i srednjih škola sa područja općine Ilidža obilježen je ovaj značajni datum. Obilježavanju je prisustvovao i načelnik Općine Ilidža prof. dr. Senaid Memić sa saradnicima koji je tom prilikom bibliotekama osnovnih i srednjih škola, JU KSR Hrasnica-Ilidža i JU Biblioteke grada Sarajeva-odjeljenje Ilidža uručio knjige. Za 11 osnovnih i dvije srednje škole, te dvije biblioteke podijeljene su 374 knjige u 22 naslova.



## Prezentacija Evropskog volonterskog servisa

Vijeće mladih Ilidža 07. aprila 2016. godine je u saradnji sa SOS Društvenim centrom „Hermann Gemeiner“ Sarajevo, organizovao vrlo uspješnu i korisnu prezentaciju Evropskog volonterskog servisa. Naime, SOS Društveni centar Hermann Gemeiner osnovan je 2000. godine sa ciljem da djeci i mladima ponudi različite pogodnosti, a između ostalog je organizacija koja je akreditovana za koordinaciju, slanje i primanje volontera u okviru programa „Mladi u akciji“.

Poznato je da mladi odlaze iz BiH u želji za sticanjem boljeg obrazovanja i prakse, a ubuduće to mogu vrlo lahko ostvariti uz pomoć Društvenog centra „Herman Gemeiner“ Sarajevo i njihovog EVS (Evropskog volonterskog servisa). Ukratko, Evropska volonterska služba, popularno nazvana EVS, dio je programa Erasmus, a omogućuje svim mladim ljudima od 17-30 godina da volontiraju od dva mjeseca do godinu dana u drugoj evropskoj zemlji i time steknu vrijedno životno i radno iskustvo.

Prezentaciji je prisustvovalo 20 mladih Ilidžanaca, koji su uživali, te se zainteresovali za ovaj vid volontiranja van granica naše države.





## Preventivne mjere zaštite od požara

Obzirom da je na pragu proljetno-ljetna požarna sezona kada se pojava požara dešava prilikom obavljanja čišćenja poljoprivrednih, šumskih i drugih površina na otvorenom prostoru, te loženjem vatre i paljenjem korova, suhe trave, lišća i drugih otpada iz Službe civilne zaštite Općine Ilidža upozoravaju nadležne ustanove, institucije i građane da je obavezno provođenje preventivnih mjera zaštite od požara u skladu sa Zakonom o zaštiti požara i vatrogastva. Kako bi izbjegli nastanak požara, kojima pogoduju visoke temperature, zabranjeno je paljenje vatre u šumi i u njenoj neposrednoj blizini prilikom čišćenja bašti od niskog rastinja i korova, zatim roštiljanje na mjestima gdje to nije dozvoljeno, bacanje opušaka na suhe površine, kao i bilo koja druga upotreba otvorenog plamena.

U slučaju požara na otvorenom prostoru potrebno je pokušati spriječiti njegovo širenje, a ako je požar većih razmjera hitno nazvati vatrogasnu jedinicu. Kada je u pitanju požar u građevinama ili drugim objektima, ukoliko nije ugrožena vlastita sigurnost, isključiti električne instalacije i plinske dovode i hitno pozvati Vatrogasnu brigadu Sarajevo na broj 123 i Vatrogasno društvo „Kenan Slinić“ Ilidža na broj 033/699 550.

Nepriдрžavanje ovih kao i ostalih Zakonom propisanih mjera, kažnjivo je i regulisano u kaznenim odredbama zakonskih propisa iz oblasti zaštite od požara.



## Završeno deminiranje lokaliteta Gradina - Golo brdo

Završeno je deminiranje lokaliteta Gradina –Golo brdo, površine 65.566 kvadratnih metara, koje je finansirala Općina Ilidža. Izvođač radova bila je firma Stop–Mine.

Također, na području općine Ilidža završeno je deminiranje lokaliteta Poljice u MZ Blažuj. Deminirano je 70.516 kvadratnih metara. Izvođač radova bila je firma Stop-Mine, a deminiranje je finansirano udruženim sredstvima Općine Ilidža i ITF-a. Pronađeno je šest protivpješadijskih mina.

Za sve informacije kontaktirajte koordinadora za deminiranje Rifata Hodžića putem telefona 061 183-728.



## Pronađene ručne bombe

Pripadnici Službe civilne zaštite Općine Ilidža u saradnji sa timom Federalne uprave civilne zaštite, 5. aprila 2016. godine, uspješno su iz korita rijeke Večerice izvadili sedam ručnih bombi M 93. Tim povodom iz Civilne zaštite apeluju na građane općine Ilidža da radi svoje i bezbjednosti ostalih stanovnika prijave uočena neeksplozivna ubojna sredstva i municiju koordinatoru za deminiranje Rifatu Hodžiću na mobilni broj 061 183 728.

## Deveta osnovna druga na državnom nivou iz programa “Upozoravanje na opasnost od mina”

Državno takmičenje iz programa “Upozoravanje na opasnost od mina” održano je 12. aprila. Takmičenje je održano u Kulturnom centru Istočno Sarajevo, a Općinu Ilidža je predstavljala ekipa Devete osnovne škole, koja je na prethodnom kantonalnom i federalnom takmičenju osvojila prvo mjesto. Ekipa Devete osnovne škole je pokazala izvanredno znanje i osvojila drugo mjesto. Za tri prvoplasirane ekipe su obezbijedeni pehari i prigodne nagrade.



## Najbolji fizičari Osme osnovne škole „Amer Ćenanović“

**Z**a učenicke osnovnih škola općine Ilidža, 8. aprila 2016. godine u Tursko-bosanskom koledžu, održano je 21. općinsko takmičenje iz fizike. Takmičili su se učenici osmih i devetih razreda iz jedanaest osnovnih škola. Svaku školu predstavljalo je po šest učenika.

U pojedinačnoj konkurenciji u kategoriji osmih razreda prvo mjesto osvojio je Tarik Muhović iz Osme osnovne škole „Amer Ćenanović“, drugo Anela Mutilović iz Osme osnovne škole „Amer Ćenanović“ i treće Hanan Memić iz Treće osnovne škole. Kod devetih razreda prvo mjesto osvojila je Emina Zolota iz Osme osnovne škole „Amer Ćenanović“, drugo Selma Budnjo iz Pete, a treće Muamer Halep iz Sedme osnovne škole. U ekipnom plasmanu najbolja je Osma osnovna škola „Amer Ćenanović“, druga Sedma i treća Peta osnovna škola. Svim učesnicima dodijeljene su diplome, a pobjednicima novčane nagrade.

## Četvrta osnovna najbolja iz informatike

**D**evetnaesto općinsko takmičenje učenika osnovnih škola Ilidže iz informatike, pod pokroviteljstvom Općinskog načelnika, održano je 31. marta 2016. godine u Osnovnoj školi „El-Manar“. Na ovom natjecanju, koje je organizirala Služba za obrazovanje, kulturu, sport i informisanje učestvovala su 33 učenika. Prvo mjesto osvojili su učenici Četvrte osnovne škole u čijoj su ekipi bili Dina Karić, Vildana Mulaosmanović i Elvedin Smajić. Drugo mjesto ekipa Desete osnovne škole: Nejla Kurtović, Amer Mekić i Adnan Kuljančić. Treće mjesto osvojila je ekipa Osme osnovne škole „Amer Ćenanović“ u čijem sastavu su bili: Nejra Dedović, Lejla Burina i Azra Đonlagić. Svaki član ekipe za osvojeno prvo mjesto dobio je 100 KM, za drugo 80, a treće mjesto 60 KM.



## Najbolji matematičari Osme osnovne škole „Amer Ćenanović“

**D**vadesetprvo općinsko takmičenje učenika osnovnih škola Ilidža iz matematike, održano je 14. aprila 2016. godine u Tursko-bosanskom Sarajevo koledžu na Ilidži. Takmičili su se učenici sedmih, osmih i devetih razreda iz jedanaest osnovnih škola. Svaku školu predstavljalo je po devet učenika.

U pojedinačnoj konkurenciji u kategoriji sedmih razreda prvo mjesto osvojila je Selma Holjan iz Druge osnovne škole, drugo Edin Duraković iz Osnovne škole „El-Manar“ i treće Azra Pamuk iz Druge osnovne škole. Kod osmih razreda prvo mjesto osvojio je Abdullah-Ali Gilić iz Osme osnovne škole „Amer Ćenanović“, drugo Asja Fazlić iz Pete osnovne škole i treće Adnan Palalija iz Osme osnovne škole „Amer Ćenanović“. Pobjednik devetih razreda je Nejra Dedović iz Osme osnovne škole „Amer Ćenanović“, drugi je Kemal Hadžiabdić iz Druge, a treći Elvedin Smajić iz Četvrte osnovne škole. U ekipnom plasmanu najbolja je Osma osnovna škola „Amer Ćenanović“, drugo mjesto zauzela je Druga, a treće Četvrta osnovna škola. Svim učesnicima dodijeljene su diplome, a pobjednicima novčane nagrade.

## Na takmičenju iz geografije najbolja Merima Orić

**Č**etnaesto općinsko takmičenje učenika osnovnih škola Ilidže iz geografije, pod pokroviteljstvom Općinskog načelnika, a u organizaciji Službe za obrazovanje, kulturu, sport i informisanje održano je u Četvrtoj osnovnoj školi u Hrasnici 7. aprila 2016. godine. Na takmičenju su učestvovali učenici devetih razreda iz 11 osnovnih škola, a svaku školu predstavljalo je po tri učenika. Prvo mjesto osvojila je učenica Devete osnovne škole Merima Orić, drugo Suada Šandal iz Devete, a treće Armin Hasečić iz Druge osnovne škole. U ekipnom plasmanu najbolja je Deveta osnovna škola, druga je Druga osnovna škola i treća Treća osnovna škola. Svim učesnicima dodijeljene su diplome, a pobjednicima novčane nagrade. Prigodan program pripremili su učenici Četvrte osnovne škole.





## Tehničari Druge osnovne škole najbolji

Domaćin 16. Smotre naučno-tehničkog stvaralaštva mladih Ilidže, koje je održano 9. aprila 2016. godine bila je Peta osnovna škola. Na takmičenju su učestvovali učenici iz 11 osnovnih škola sa područja općine Ilidža. Svaku školu predstavljalo je po pet učenika. Prvo mjesto osvojili su tehničari Druge osnovne škole koju su predstavljali Emina Hukić, Medina Gadžo, Azra Pamuk, Anesa Ćosić i Armin Hasečić. Drugo mjesto pripalo je ekipi Pete osnovne škole za koju su se takmičili Rijalda Ragipović, Lamija Fatić, Dženana Džano, Asija Fazlić i Dino Šabaredžović, dok je trećeplasirana Prva osnovna škola i njeni učenici Jasmin Čubrilo, Emina Metović, Imran Medović, Edin Bijelonja i Nejra Bašić. Pobjednicima su uručene diplome koji će predstavljati Ilidžu na kantonalnom takmičenju. Organizator takmičenja je Udruženje tehničke kulture Ilidža.



## Djeca mogu sve, samo ih treba potaknuti

Djeca sa područja Ilidže ubrzo će biti dostupna potpuno nova metoda učenja, i to u Brainobrain akademiji koja će u maju biti otvorena u prostorijama Obrazovno-raznodnog centra Spajalica. Riječ je o inovativnom međunarodnom programu razvoja intelektualnih i životnih vještina kod djece uzrasta od 4 do 14 godina. Cilj programa je omogućiti djeci da uz inovativne tehnike i drevne azijske metode nauče razvijati i koristiti svoje potencijale. Program Brainobrain akademije zasnovan je na tehnikama Abacus – mentalna aritmetika na drevnom azijskom računalu, zatim NLP – neurolingvističko programiranje, te VAK – istovremeno treniranje tri čula.

Djeca na kraju postižu odlične rezultate iz matematike, ali im ove tehnike pomažu i u jačanju samopouzdanja, razvijanju brzine i tačnosti, fotografskog pamćenja, vizualizacije, i u konačnici postaju kreativnija i odlučnija. Časovi će se održavati jednom sedmično, sa djecom rade licencirani treneri, a cijeli program podijeljen je u deset nivoa. Upis je već počeo, a roditelji sve potrebne informacije o Brainobrain akademiji mogu pronaći na web stranici [www.djeca.eu](http://www.djeca.eu) ili u Brainobrain Centru Ilidža, u kojem se nalazi Info-desk. Info-desk otvoren je od ponedjeljka do petka od 14.30 do 16.30 sati.

Brainobrain program zastupljen je u dvadeset zemalja svijeta među kojima su Indija, Ujedinjeni Arapski Emirati, Velika Britanija, Saudijska Arabija, SAD, Švedska, Katar, Kanada, a od maja i na dvije lokacije u Bosni i Hercegovini. Brainobrain akademije bit će otvorene u sarajevskim općinama Ilidža i Novi Grad.

## Prepoznavanje i podrška nadarenim učenicima

Prepoznavanje i podrška nadarenim učenicima bila je tema sastanka Koordinacije vijeća roditelja ilidžanskih škola koji je održan 14. aprila u Osnovnoj školi El-Manar.

Statistički podaci govore da u školama postoje takvi učenici i studenti ali da je potrebno zajedno više uraditi na promociji takvih učenika, kao i iznalaženje načina kako pomoći i školama da prepoznaju nadarene učenike i da s njima nastavnicima rade u kontinuitetu.

Na sastanku je rečeno da bi Ministarstvo za obrazovanje, nauku i mlade Kantona Sarajevo trebalo zaposliti psihologe i socijalne radnike koji bi stručno radili s nadarenim učenicima. U cilju stvaranja kreativnog okruženja i poticaja rada i razvoja nadarenih učenika, škole, resorno ministarstvo, općine i nevladin sektor trebale bi da poduzmu aktivnosti kojima će se graditi jedan sistem u našoj državi u ovoj oblasti.

Potrebno je, počevši od 2016/2017. da se izradi anketni upitnik kod upisa djece u škole gdje bi bila rubrika za roditelje, izjašnjavanje da li dijete posjeduje neke sklonosti, u školama planirati prostor, odnosno kabinete za nadarene učenike, a i da Ministarstvo planira novčana sredstva za talentovane učenike.

Novi način takmičenja bilo bi potrebno osmisliti za narednu godinu, kao i izrada baze podataka talentovanih učenika kako u školama tako i na nivou općine i Ministarstva.

Uvodničari o ovoj temi bili su Šefket Arslanagić, Fatima Habota i Muamer Tinjak. Na ovoj tematskoj sjednici kao jedan inovativni način saradnje, roditelja i škole prezentovan je projekat Erasmus plus koji se primjenjuje u Osnovnoj školi "Aleksa Šantić".

Sporazum o pristupu tom programu potpisale su Prva, Druga, Četvrta, Peta i Deveta osnovna škola.

## Završeno takmičenje osnovaca u odbojci, košarci i fudbalu

Općinsko takmičenje učenika osnovnih škola iz košarke, fudbala i odbojke završeno je 27. aprila 2016. god. U Kulturno – sportskom centru Ilidža podijeljene su medalje i pehari najboljima. Takmičenje je održano pod pokroviteljstvom Općine Ilidža.

U kategoriji odbojke u ženskoj konkurenciji prvo mjesto pripalo je Drugoj osnovnoj školi, drugo Prvoj osnovnoj školi, dok je treće osvojila Deseta osnovna škola.

U košarci, u muškoj konkurenciji prvo mjesto osvojila je Treća osnovna škola, drugo Druga osnovna škola i treće mjesto pripalo je Četvrtoj osnovnoj školi.

U fudbalu u muškoj konkurenciji prvo mjesto je osvojila Prva osnovna škola, drugo Osmo osnovna škola "Amer Čenanović" i treće mjesto Sedma osnovna škola.



## Peta tradicionalna ulična trka „Amer Ćenanović“

Prvog aprila 2016. godine navršilo se pet godina od prerane smrti načelnika Općine Ilidža Amera Ćenanovića. Tim povodom u znak sjećanja na ovog velikog i plemenitog čovjeka petu godinu zaredom održana je ulična trka „Amer Ćenanović“.

U trci dužine oko tri kilometra, koju je organizovala Općina Ilidža, učestvovalo je 500 učenika osnovnih i srednjih škola sa područja Kantona Sarajevo.

Prvo mjesto među djevojčicama osnovnih škola osvojila je Varvara Šešlija iz Međunarodne osnovne škole, drugo Hena Kapidžić iz Desete osnovne škole i treće Ena Hamzić iz Međunarodne osnovne škole. U kategoriji dječaka prvi kroz cilj prošao je Ajdin Jusupović iz Desete osnovne škole, drugi Miralem Selak iz Osme osnovne škole „Amer Ćenanović“ i treći Amel Muratović iz Sedme osnovne škole. Od srednjoškolki prva je bila Nejra Ališpago iz Međunarodne srednje škole, druga Adelisa Hromo iz Pete gimnazije i treća Džemila Hadžić iz Četvarte gimnazije.

Prvo mjesto u kategoriji učenika srednjih škola osvojio je Bilal Brajlović iz Međunarodne srednje škole, drugo Enijad Nuković i treće Šefik Pločo obojica iz Srednje tehničke škole grafičkih tehnologija, dizajna i multimedije.

Medalje i zahvalnice pobjednicima su uručili načelnik Općine Ilidža prof. dr. Senaid Memić, Muhamed Omerović predsjedavajući i Suljo Alić dopredsjedavajući Općinskog vijeća Ilidža.

„Sretan sam što sam danas sa vama. Ovo je najbolji način da se prisjetimo i pamtimo ovog velikog čovjeka i da zajedno radimo na budućnosti kakvu je on gradio i želio. Ilidža je bogata općina mnogim ljepotama, ali je najbogatija djecom kao što ste vi. Svi koji su učestvovali i stigli na cilj su pobjednici. Djeca iz Bosne i Hercegovine imaju zdrav genetski materijal i ne treba da brinu za svoju budućnost“, poručio je učesnicima trke načelnik Memić.

